



PATNUBAY SA MISA


3 Marso 2019

Ika-8 Linggo sa Karaniwang Panahon

Taon K

Ang Alagad na Talagang Mabunga

Tayo ay nasa Ikawalong Linggo sa Karaniwang Panahon. Ang pagtutuwid sa mga kamalian ng ating kapwa ay mabuti at isang gawain ng pag-ibig. Ngunit ito ay isa sa mga pinakamahirap gawin. Una sa lahat, dapat iayos muna ng magtutuwid ang kanyang sariling buhay. Paano ka nga naman magtutuwid kung kapintas-pintas din naman ang iyong sariling buhay? Pangalawa, kailangang hanapin ang pinakamabisang paraan ng pagtutuwid – yaong paraang tatanggapin ng taong itinutuwid.



PASIMULA



Pambungad

(Ipahahayag lamang kung walang awiting nakahanda.)

Sa aki'y ang nag-iingat ay Panginoong matapat. Ako'y kanyang iniligas sa panganib na mabihag. Mahal n'ya ako sa lahat.

Pagbati

P– Ang pagpapala ng ating Panginoong Hesukristong nagtutuwid ng ating mga kamalian, ang pag-ibig ng Diyos Amang mapagpatawad, at ang pakikipagkaisa ng Espiritu Santong nagpapabanal ay sumainyong lahat!
B– At sumaiyo rin!

Pagsisi

P– Nais nating maging mga mabungang alagad ng ating Panginoong Hesus. Pagsisihan natin ang ating katigasan ng loob na magbago at magmalasakit sa

kabutihan ng iba.

(Manahimik sandali.)

P– Para sa aming kawalan ng pananampalataya sa iyong balak para sa aming kabanalan, Panginoon, kaawaan mo kami.

B– Panginoon, kaawaan mo kami!

P– Para sa aming kahinaan ng pag-asa sa lakas na iyong ibinibigay para sa aming pagbabago, Kristo, kaawaan mo kami.

B– Kristo, kaawaan mo kami!

P– Para sa aming kakulangan ng pagmamahal sa iyo at sa mga taong nangangailangan ng aming pagtutuwid, Panginoon, kaawaan mo kami.

B– Panginoon, kaawaan mo kami!

P– Kaawaan tayo ng makapangyarihang Diyos, patawarin tayo sa ating mga kasalanan, at dalhin tayo sa buhay na walang hanggan.

B– Amen!

Papuri

B– Papuri sa Diyos sa kaitaasan

at sa lupa'y kapayapaan sa mga taong kinalulugdan niya. Pinupuri ka namin, dinarangal ka namin, sinasamba ka namin, ipinagbubunyi ka namin, pinasalamatan ka namin dahil sa dakila mong angking kapurihan. Panginoong Diyos, Hari ng langit, Diyos Amang makapangyarihan sa lahat.

Panginoong Hesukristo, Bugtong na Anak, Panginoong Diyos, Kordero ng Diyos, Anak ng Ama. Ikaw na nag-aalis ng mga kasalanan ng sanlibutan, maawa ka sa amin. Ikaw na nag-aalis ng mga kasalanan ng sanlibutan, tanggapin mo ang aming kahilingan. Ikaw na naluluklok sa kanan ng Ama, maawa ka sa amin. Sapagkat ikaw lamang ang banal, ikaw lamang ang Panginoon, ikaw lamang, O Hesukristo, ang Kataas-taasan, kasama ng Espiritu Santo sa kadakilaan ng Diyos Ama. Amen!

Panalanging Pambungad

P– Ama naming makapangyarihan, ipagkaloob mong maitaguyod ang sanlibutan sa matiwasa'y na pag-iral ayon sa layunin mo para sa aming kapakanan sa pag-samba sa iyo nang may panatag na kalooban sa pamamagitan ni Hesukristo kasama ng Espiritu Santo magpasawalang hanggan.
B– Amen!

PAGPAPAHAYAG NG SALITA NG DIYOS



Unang Pagbasa Sir 27:4-7

Sa salitang namumutawi sa bibig namamalas ang kalooban ng tao. Sa kakayahang magsalita nang maayos nasusubok ang kabutihan ng tao. Sa Aklat ni Sirak ang pagsasalita ay itinuturing na bunga at ang kalooban ay ang punong pinanggagalingan nito.

L–Pagpapahayag mula sa Aklat ni Sirak

Pag niliglig mo ang bistay, maiwan ang magaspang; pag ang tao'y nagsalita, kapintasa'y lumilitaw. Ang gawa ng magpapalayok ay sa hurno nasusubok, ang pagkatao ng sinuma'y makikita sa usapan. Sa bunga ng punongkahoy nakikilala ang ginagawang pag-aalaga; sa pangungusap ng isang tao, damdamin niya'y nahahalata.

Huwag mo munang pupurihin ang isang tao hanggang hindi nakapagsalita, sapagkat doon mo pa makikilala ang tunay niyang puso't diwa.

Ang Salita ng Diyos!

B– Salamat sa Diyos!

Salmong Tugunan Salmo 91

B–*Totoong kalugud-lugod ang magpasalamat sa D'yos!*

A. Robleza



* Ang magpasalamat sa Panginoong Diyos ay mabuting bagay, umawit na lagi purihin ang ngalang Kataas-taasan. Pag-ibig n'yang wagas ay dapat ihayag, kung bukang-liwayway, pagsapit ng gabi

ang katapatan n'ya'y ihayag din naman.
B.

* **Katulad ng palma, ang taong matuwid tatatag ang buhay, parang mga sedro, kahoy sa Libano, lalagong mainam. Parang punongkahoy na doon natanim sa tahanan ng Diyos, sa banal na templo ito ay lalago na nakalulugod.**
B.

* **Tuloy ang pagbunga kahit na ang punong ito ay tumanda, luntia't matatag, at ang dahon nito ay laging sariwa. Ito'y patotoo na ang Panginoon'y tunay na matuwid, siya kong sanggalang, matatag na batong walang bahid dungis.**
B.

Ikalawang Pagbasa 1 Cor 15: 54-58

Sa ating Ikalawang Pagbasa kinukutya ni San Pablo ang kamatayan. Sa muling pagkabuhay ni Kristo ay nagapi na ang kamatayan. Wala na itong kakayahang igapos ang tao sa kanyang kapangyarihan nang habang panahon. Ang pagwawagi ni Hesus sa kamatayan ay ang pagwawagi rin ng sangkatauhan laban sa kamatayan.

L–Pagpapahayag mula sa Unang Sulat ni Apostol San Pablo sa mga taga-Corinto

Mga kapatid, kapag napalitan na ng walang pagkabulok ang nabubulok at napalitan na ng walang kamatayan ang namamatay, matutupad ang nasasaad sa Kasulatan: “Nalupig na ang kamatayan; ganap na ang tagumpay!” “Nasaan, O kamatayan, ang iyong tagumpay? Nasaan, O kamatayan, ang iyong kamandag?”

Ang kamandag ng kamatayan ay ang kasalanan, at ang lakas ng kasalanan ay nagmumula sa Kautusan. Magpasalamat tayo sa Diyos na nagbibigay sa atin ng tagumpay sa pamamagitan ng ating Panginoong Hesukristo!

Kaya nga, mga kapatid, magpakatatag kayo at huwag matitinag. Magpakasipag kayo sa gawain para sa Panginoon yamang alam ninyong di nasasayang ang inyong pagpapagal para sa kanya.

Ang Salita ng Diyos!

B– Salamat sa Diyos!

Aleluya

Fil 2:15.16

B–Aleluya! Aleluya!

Sa daigdig ay lagang liwanag na sumisikat salitang buhay ng lahat.
Aleluya! Aleluya!

Mabuting Balita Lu 6:39-45

Ang ating Ebanghelyo ay nagtuturo ng tunay na pagmamahal sa kapwa. Ito ay ang paghahangad na bumuti siya at marating ang kaganapan ng buhay. Ang mabuning alagad ni Kristo ay siyang nakatutulong sa kabanalan ng kanyang kapwa, sa pamamagitan ng pagtutuwid sa sarili at sa kanyang kapwa.

P–Ang Mabuting Balita ng Panginoon ayon kay San Lucas

B–Papuri sa iyo, Panginoon!

Noong panahong iyon, tinanong ni Hesus ang mga alagad nang patalinghaga: “Maaari bang maging tagaakay ng bulag ang isa ring bulag? Kapwa sila mahuhulog sa hukay kapag ginawa ang gayon.

Walang alagad na higit sa kanyang guro; ngunit kapag lubusang naturuan, siya'y magiging katulad ng kanyang guro.

Ang tinitingnan mo'y ang puwing ng iyong kapatid, ngunit hindi mo pinapansin ang tahlilan sa iyong mata. Paano mo masasabi sa iyong kapatid, 'Kapatid, bayaan mong alisin ko ang iyong puwing,' gayong hindi mo nakikita ang tahlilang nasa iyong mata? Mapagpaimbabaw! Alisin mo muna ang tahlilan sa iyong mata, at makakikita kang mabuti; sa gayo'y maaalis mo ang puwing ng iyong kapatid.

Walang mabuting punong-kahoy na namumunga ng masama, at walang masamang punongkahoy na namumunga ng mabuti. Nakikilala ang bawat punongkahoy sa pamamagitan ng kanyang bunga. Sapagkat hindi nakapipitas ng igos sa puno ng aroma, at di rin nakapipitas ng ubas sa puno ng dawag. Ang mabuting tao ay nakapagdudulot ng mabuti sapagkat tigib ng kabutihan ang kanyang puso; ang masamang tao ay nakapagdudulot ng masama, sapagkat puno ng kasamaan ang kanyang puso. Sapagkat kung ano ang bukambibig siyang laman ng dibdib.”

Ang Mabuting Balita ng Panginoon!

B–Pinupuri ka namin, Panginoong Hesukristo!

Homiliya

Sumasampalataya

B–Sumasampalataya ako sa Diyos Amang makapangyarihan sa lahat, na may gawa ng langit at lupa.

Sumasampalataya ako kay Hesukristo, iisang Anak ng Diyos, Panginoon nating lahat. Nagkawatang-tao siya lalang ng Espiritu Santo, ipinanganak ni Santa Mariang Birhen. Pinagpakasakit ni Poncio Pilato, ipinako sa krus, namatay, inilibing. Nanaog sa kinaroroonan ng mga yumao. Nang may ikatlong araw nabuhay na mag-uli. Umakyat sa langit. Naluluklok sa kanan ng Diyos Amang makapangyarihan sa lahat. Doon magmumulang paririto at huhukom sa nangabubuhay at nangamatay na tao.

Sumasampalataya naman ako sa Diyos Espiritu Santo, sa banal na Simbahang Katolika, sa kasamahan ng mga banal, sa kapatawaran ng mga kasalanan, sa pagkabuhay na muli ng nangamatay na tao at sa buhay na walang hanggan. Amen!

Panalangin ng Bayan

P–Tayo ay nagpapasalamat sa Amang naghahangad ng kabanalan para sa Kanyang mga anak. Puno ng pagmamahal sa Kanya, dalhin natin ang ating mga pangangailangan at sambitin:

B – Amang nagpapabanal, dinggin Mo ang Iyong bayan!

* Para sa mga namumuno sa Simbahan, upang maging masigasig sila sa pagtahak sa landas ng pagtutuwid sa sarili at sa daan ng kabanalan, manalangin tayo sa Panginoon! **B.**

* Para sa lahat ng mga kabataan ng ating bayan, upang sa taong ito ng mga kabataan ay magtulungan sila sa pagtutuwid sa isa't isa nang matamo ang pangarap nilang kaganapan, manalangin tayo sa Panginoon! **B.**

* Para sa mga namumuno sa ating bansa, upang mahanap nila ang tamang paraan sa pagtutuwid sa mga kamalian ng ating lipunan, manalangin tayo sa Panginoon! **B.**

* Para sa mga taong nababao sa kasalanan at kasamaan, upang maging bukas ang kanilang kalooban sa pagtutuwid sa kanila ng mga taong nagmamalasakit sa kanilang kapakanan, manalangin tayo sa Panginoon! **B.**

* Para sa ating lahat na nagkakatiyon sa pagdiriwang na ito, upang maituwid natin ang ating mga sariling kamalian at magtulungan tayo sa pagtutuwid sa isa't isa, manalangin tayo sa Panginoon! **B.**

* Tahimik nating ipanalangin ang ating mga sariling kahilingan. (*Tumigil sandali.*)
Manalangin tayo! **B.**

P –Ama naming bukal ng kabanalan, isugo Mo sa amin ang Iyong Banal na Espiritu upang matukyan naming ang matuwid na landas ay ang daan ng kaganapan sa buhay. Hinihiling namin ito sa pamamagitan ng Iyong Anak na si Hesukristong aming Panginoon. **B** –Amen!



P–Manalangin kayo . . .

B–Tanggapin nawa ng Panginoon itong paghahain sa iyong mga kamay sa kapurihan niya at karangalan, sa ating kapakinabangan at sa buong Sambayanan niyang banal.

Panalangin ukol sa mga Alay

P–Ama naming Lumikha, ipinagkakaloob mo ang mga dapat ialay upang aming sambahin ang iyong ngalan. Kaawaan mo kami at pagbigyan upang ang iyong kaloob para kami'y makapaghain ay mapakinabangan bilang pagpapala mo sa amin sa pamamagitan ni Hesukristo kasama ng Espiritu Santo magpasawalang hanggan. **B** – Amen!

Prepasyo VI

P–Ama naming makapangyarihan, tunay ngang marapat na ikaw ay aming pasalamat.

Nasa iyo ang aming buhay, pagkilos at pag-iral. Sa pamumuhay namin araw-araw tinatamasa namin ang iyong pagmamahal. Sa pag-ibig mong ipinunla sa sangkatauhan ang Espiritu Santo'y unang aning bigay ng Anak mong naglagak sa amin ng katiyakang nakalaang mabuhay kami sa piling mo kailanman.

Kaya kaisa ng mga anghel na nagsisiawit ng papuri sa iyo nang

walang humpay sa kalangitan, kami'y nagbubunyi sa iyong kadakilaan:

B – Santo, santo, santo . . .

Pagbubunyi

B –Sa krus mo at pagkabuhay kami'y natubos mong tunay, Poong Hesus naming mahal, iligtas mo kaming tanan ngayon at magpakailanman.



B – Ama namin . . .

P – Hinihiling namin . . .

B – Sapagkat iyo ang kaharian at ang kapangyarihan at ang kapurihan magpakailanman! Amen!

Paanyaya sa Kapayapaan

Paghahati-hati sa Tinapay

B – Kordero ng Diyos . . .

Paanyaya sa Pakikinabang

P – Ito si Hesus, ang Kordero ng Diyos na nag-aalis ng mga kasalanan ng sanlibutan. Mapalad ang mga inaanyayahan sa kanyang piging.

B – Panginoon, hindi ako karapat-dapat na magpatuloy sa iyo ngunit sa isang salita mo lamang ay gagaling na ako.

Antipona ng Pakikinabang

(*Ipahahayag lamang kung walang awiting nakahanda.*)

Dahil sa 'yong kabutihan na sa aki'y iyong bigay, D'yos ko, aking aawitan ang iyong dakilang ngalan, Poong kataas-taasan.

Panalangin Pagkapakinabang

P – Ama naming mapagmahal, kaming iyong pinapakinabang ay iyong kaawaan upang ang aming pinagsaluhan ay magdulot ng aming pakikilahok sa iyong buhay na hindi matatapos. Iniluluhog namin ito sa pamamagitan ni Hesukristo kasama ng Espiritu Santo magpasawalang hanggan. **B** – Amen!



P – Sumainyo ang Panginoon.

B – At sumaiyo rin!

P –Pagpalain kayo ng makapangyarihang Diyos:
Ama at Anak at Espiritu Santo.

B –Amen!

P –Humayo kayong taglay ang kapayapaan upang
ang Panginoon ay mahalín at paglingkuran.

B –Salamat sa Diyos!

Ang Mabungang Pagtutuwid sa Bayan ng Diyos

Nais nating magkaroon ng mabungang buhay. Ito ay magaganap lamang kapag tayo ay makapag-iiwan ng bunga sa ating pagpanaw. May kasabihang para magkaroon ng mabungang buhay ay kailangang gumawa ng tatlong bagay: (1) magtanim ng puno; (2) sumulat ng aklat; (3) magkaroon ng anak. Ang puno, ang aklat, at ang anak ay tunay na tanda ng mabungang buhay. Ngunit may iba pa ring kahulugan ang mga ito. Ang pagtanim ng puno ay ang pagkakaroon ng buhay na makabuluhan para sa kalikasan. Ang pagsusulat ng aklat ay ang pagkakaroon ng buhay na makabuluhan para sa kultura ng lipunan. Ang pagkakaroon ng anak ay ang pag-sisikap na mapagyman ang ugnayan ng mga tao sa isa't isa.


Ang pagpapayaman sa ugnayan ng mga tao, para sa isang alagad ni Kristo, ay ang pagtataguyod sa pagkakaisa at pagyabong ng Bayan ng Diyos. Mangyayari lamang ito kapag kaya nating gawin ang mga sumusunod na bagay. Ang una ay ang pagtutuwid ng sarili. Dapat nating saliksikin sa ating mga sarili ang mga kamalian at kapintasang dapat mawala. Ang pagbabago ng Bayan ng Diyos ay nagsisimula sa pagbabago ng ating sarili.

Ang ikalawa ay ang pagpansin sa mga maaaring ituwid sa iba. Hindi ito pamumuna sa mga kapintasan ng iba. Ito ay ang paghahangad na bumuti sila at umayos ang buong Mag-anak ng

Panginoon. Subalit kailangang hiwalayin ang mali sa nagkakamali. Ang mali ay dapat ituwid. Kaya nga lamang ang nagkakamali ay dapat laging mahalín. Nagsisimula ang pagtutuwid sa taimtim na panalangin para sa taong nagkakamali.

Ang pagtutuwid sa ating kapatid ay dapat ayon sa nais ng Panginoong nakasaad kay Mateo 18:15-17. Ang unang hakbang ay ang personal o sarilínang pagtutuwid. Tayo lamang dalawa ang unang dapat mag-usap. Napakahirap gawin nito. Ngunit ito ay ang tanda ng tunay na pagpapahalaga sa ating kapatid. Kapag hindi siya nakinig ay maaari tayong magsama ng ilang mga matalik niyang kaibigan. Sa pag-uusap ng munting grupong ito ay maaaring mahimok ang kapatid na nagkakamali. Kapag hindi pa rin nakinig ay saka na siya iharap sa mga namumuno sa pamayanan o sa buong Bayan ng Diyos. Hindi ito dapat gawin hanggang hindi pa nasusubukan ang unang dalawang hakbang. Kailangang pangalagaan ang pangalan, dangal, at reputasyon ng kapatid na nagkakamali. Lalong-lalo na, dapat iwasan ang pagkakalat ng kanyang kamalian sa *social media*. Hindi ito maka-Kristiyanong paraan.

Kapag umaayos ang ating mga kapatid ay umaayos din ang buong Bayan ng Diyos. Kapag higit na maayos ang pamayanang ating iniwan kaysa pamayanang ating naratnan ay naging mabunga talaga ang ating buhay.



“Tayo na sa Antipolo: A Theo-dula of the Alay Lakad sa Antipolo”

by Fr. Juvelan Paul N. Samia, SDB Ma.Th.
and edited by Fr. Rene Lagaya, SDB, M.T.D.

Is the fourth in the Monograph Series of Don Bosco Center of Studies, Parañaque. The book, intended for clergy and consecrated persons, students of theology, and lay leaders, contains a systematic presentation of and some theological explorations on popular piety, particularly Alay Lakad. It proposes a 4-stage pastoral approach to discern, understand, articulate and evangelize the people’s faith as celebrated in their practices of piety. At the same time, it employs a theological framework for interpretation based on aesthetics called “Theo-Dula.”

Book Price: P 450.00

Discounted Price for clergy and consecrated persons and students of theology: P 390.00



**WORD & LIFE
PUBLICATIONS**

Don Bosco Compound, A. Arnaiz Ave. cor. Chino Roces Ave., Makati, Metro Manila

Postal Address: P.O. Box 1820, MCPO, 1258 Makati, Metro Manila, Philippines

Tel. Nos. 894-5401; 894-5402; 892-2169 • **Telefax:** 894-5241 • **Website:** www.wordandlife.org

• **E-mail:** marketing@wordandlife.org; wordandlifepublications@gmail.com • **FB:** Word & Life Publications

• **Editorial Team:** Fr. S. Putzu, Fr. R. Lagaya, C. Valmonte, V. David, J. Domingo, A. Adsuara, D. Daguio

• **Illustrations:** A. Sarmiento, B. Cleofe • **Marketing:** Fr. B. Nolasco • **Circulation:** R. Saldua